

Bosna i Hercegovina  
Federacija Bosne i Hercegovine  
Tuzlanski kanton  
OPĆINSKI SUD U GRAČANICI  
Broj: 27 0 K 047890 22 K 2  
Gračanica, 06.03.2023. godine

## U IME FEDERACIJE BOSNE I HERCEGOVINE

Općinski sud u Gračanici, po sudiji Husejinu Šerbečić, sa zapisničarom Nadinom Delić, u krivičnom postupku protiv optuženog A. H., zbog krivičnog djela - Porezna utaja iz člana 273. stav 1. Krivičnog zakona Federacije Bosne i Hercegovine, po optužnici Kantonalnog tužilaštva Tuzlanskog kantona broj T03 0 KTPO 0095292 21 od 10.08.2021. godine, na osnovu člana 421. stav 3. Zakona o krivičnom postupku donio je

### P R E S U D U

Osuđenom:

**A. H.**, sin S. i majke E. djevojačko Š., rođen ... godine u mjestu B. M. - Općina D. I., nastanjen u mjestu B. V. broj ...– Općina D. I., pismen sa završenom Mješovitom srednjom školom u B. V., po zanimanju prehrambeni tehničar, zaposlen kao samostalni freelancer, oženjen otac dvoje malodobne djece, Bošnjak, državljanin BiH, vojsku nije služio, ne vodi se u vojnoj evidenciji, JMB: ..., neosuđivan, ne vodi se drugi krivični postupak

### OPOZIVA SE UVJETNA OSUDA

izrečena presudom Općinskog suda u Gračanici broj: 27 0 K 047890 21 K od 08.12.2021.godine, kojom je utvrđena kazna zatvora u trajanju od 10 (deset) mjeseci i istovremeno određeno da utvrđena kazna neće biti izvršena ako optuženi u roku od 2 (dvije) godine po pravosnažnosti presude ne izvrši novo krivično djelo te se

### O D R E Đ U J E

izvršenje KAZNE ZATVORA U TRAJANJU OD 10 (deset) MJESECI i osuđeni upućuje na  
izdržavanje kazne

### O b r a z l o Ź e n j e

Kantonalno tužilaštvo TK je optužnicom broj: T03 0 KTPO 0095292 21 od 10.08.2021. godine. godine optužilo H. A., zbog produženog krivičnog djela – Porezna utaja iz člana 273. stav 1. Krivičnog zakona Federacije Bosne i Hercegovine.

Presudom Općinskog suda u Gračanici broj 27 0 K 047890 21 K od 08.12.2021. godine osuđenom je utvrđena kazna zatvora u trajanju od 10 (deset) mjeseci i istovremeno određeno da

utvrđena kazna neće biti izvršena ako osuđeni u roku od 2 (dvije) godine po pravosnažnosti presude ne izvrši novo krivično djelo.

Istom presudom od osuđenog je oduzeta imovinska korist pribavljena krivičnim djelom u iznosu od 24.195,99 KM (dvadesetčetirihiljadestostinudevedesetpet konvertibilnih maraka i 99 pfeninga) i obavezan osuđeni da istu uplati u roku od 6 mjeseci po pravosnažnosti presude te mu je određen poseban uslov da će uvjetna osuda biti opozvana ako osuđeni u roku koji mu je određen ne uplati navedeni iznos.

Od pravosnažnosti presude 25.01.2022. godine je protekao rok od 6 mjeseci u kojem je osuđeni bio obavezan da isplati navedeni iznos, a osuđeni nije izvršio isplatu prema podacima u spisu.

Sud je pozivom od 12.10.2022. godine pozvao osuđenog da dostavi dokaz da je izvršio uplatu navedenog iznosa po navedenoj presudi uz upozorenje da će ukoliko to ne učini presuda biti opozvana i izvršena kazna zatvora u trajanju od 10 (deset) mjeseci.

Navedeni poziv osuđeni je primio 17.10.2022.godine i po istom nije postupio tako da je sud otvorio novu K 2 fazu u predmetu i zakazao ročište za saslušanje radi opoziva uslovne osude za 28.11.2022.godine na koje se osuđeni nije odazvao, iako je dostava uredna prema dostavnici u spisu koja potvrđuje da je poziv primio 22.11.2022.godine.

S tim u vezi sud je u smislu odredbi člana 421. Zakona o krivičnom postupku zakazao ročište za opoziv uslovne osude po službenoj dužnosti koje je održano 09.01.2023. godine.

Na ročištu je tužilac predložio opoziv uvjetne osude ukazujući da je osuđeni ostvario prihode prema presudi kojom je osuđen po osnovu pružanja intelektualnih usluga i da je zaposlen kao freelancer zato što u generalijskim podacima u presudi kojom je osuđen stoji da je zaposlen kao samostalni freelancer a osuđeni to nije osporio u postupku.

Osuđeni je na istom ročištu izjavio da je novac koji je zaradio za njega "humanitarne pare" i da je na taj način htio da popravi svoj život da kupi hranu sebi, ženi, djeci. Navodi da nema novaca uopšte, nema marke, nema čime doći na sud i ne može platiti. Za dio sredstava postoji ugovor o djelu sa kompanijama a ostalo je pomoć njemu. Na upit suda da li ima namjeru da plati je izjavio "ja nemam para da to platim".

Nakon održanog ročišta sud je pribavio podatke o imovini osuđenog od nadležnih organa i utvrdio da osuđeni ima otvoren bankovni tekući račun kod Raiffeisen bank d.d. BiH Sarajevo broj 0613000079107435 koji je aktivan od 07.10.2017.godine što potvrđuje akt Finansijsko-informatičke agencije FBiH broj 05-1-11-16-905-2/23 od 31.01.2023.godine.

Prema izvještaju porezne ispostave D. I., Kantonalni porezni ured Tuzla, Porezna Uprava FBiH broj 13-3/4-12-44-411/23 od 16.01.2023.godine, i akta JU Služba za zapošljavanje Tuzlanskog kantona, od 13.01.2023.godine osuđeni se vodi kao nezaposlena osoba od 11.10.2016.godine i ostvaruje zdravstveno osiguranje kod JU Služba za zapošljavanje Tuzlanskog kantona.

Prema izvještaju Ministarstva unutrašnjih poslova TK, Sektor za upravno-pravne i kadrovske poslove, Odsjek za administraciju D. I. broj 08-03/6-03.9-2-30/2023 od 17.01.2023.godine osuđeni nema registrovano motorno vozilo.

Prema izvještaju Općinskog suda u Gračanici broj 027-0-RZ-23-000 035 od 12.01.2023.godine osuđeni nije upisan kao vlasnik nekretnina.

Dakle, od imovine osuđeni samo ima aktivan račun kod Raiffeisen banke d.d. Sarajevo kako je to navedeno i druge imovine nema.

Dovodeći podatke o imovini osuđenog u vezu sa činjenicom da je prema presudi Općinskog suda u Gračanici koja je predmet opoziva broj 27 0 K 047890 21 K od 08.12.2021.godine, odnosno činjeničnom opisu iste osuđeni u vremenskom periodu od 01.01.2019.godine do 31.03.2021.godine ostvario ukupan prihod u iznosu od 222.389,63 KM i da su ta sredstva uplaćena na njegov račun otvoren kod Raiffeisen bank d.d. Sarajevo, sud nalazi da

izvještaj o imovini osuđenog ukazuju da on ili ima sredstva na navedenom računu kod Raiffeisen bank d.d. Sarajevo ili ta sredstva prikriva u cilju sprječavanja prinudne naplate iznosa na koji je obavezan navedenom presudom.

Naime, navedena sredstva odnosno prihod koji je osuđeni ostvario u navedenom periodu su približno jednaka iznosu 220 (dvijestotine i dvadeset) prosječnih plata u Federaciji BiH prema dostupnim statističkim izvještajima koji su javno objavljeni i služe kao osnovica za obračun plata (npr. sudija i dr.). Dakle, u navedenom period 2019.godine osuđeni je ostvario približno platu za 220 mjeseci a nema automobile, nema nekretnina, prijavljen je skoro 7 godina kao nezaposlena osoba i po tom osnovu ostvaruje pravo na zdravstvenu zaštitu koja se isplaćuje iz sredstava prikupljenih naplatom poreza i doprinosa koje osuđeni izbjegava da plati.

Sud je nakon što je prikupio podatke o imovini osuđenog zakazao ročište za 27.02.2023.godine sa ciljem da osuđenog upozna sa rezultatima provjere imovine istog i omogući mu dodatno vrijeme da izvrši svoju obavezu po presudi koja je predmet opoziva ali se na isto ročište isti nije odazvao a na javno dostupnim mrežama je iznio objavu na kojoj pali poziv suda i to naziva "triješće" za potpalu. S tim u vezi sud je prikupio sve objave javno dostupne putem interneta koje je osuđeni objavio u vezi sa postupkom opoziva i predmetom opoziva i uložio u spis suda. Na osnovu istih je nesporno da osuđeni ima opremu koju koriste influenceri, da je aktivan na društvenim mrežama a u jednoj objavi objavljuje da planira snimiti film o predmetnom sudiji u ovom postupku kao i da je otputovao u Norvešku i da se odmara, što sve ukazuje da on ima sredstva. Naime, snimanje filma nije besplatno, putovanje nije besplatno, a po ocjeni suda on je i dalje aktivan i ostvaruje sredstva kao influencer.

Ni po naredbi suda za ročište zakazano za 06.03.2023.godine osuđeni se nije odazvao i prema izvještaju sudske policije, Stanica Gračanica od 06.03.2023.godine osuđeni živi na adresi iz spisa u kući koja ima video nadzor na svim uglovima kuće tako da je pokriven cijeli prostor oko kuće što takođe ukazuje da osuđeni ima imovinu ali je po ocjeni suda ona upisana na druga lica o čemu nije vršena provjera.

Cijeneći da su osuđeni i tužilac saslušani u ovom postupku, da se Federalni pravobranilac FBiH nije odazvao na ročište iako je uredno pozvan, sud nalazi da je u smislu odredbi člana 421. stav 3. Zakona o krivičnom postupku formalno ispunjen uslov za donošenje presude u ovom predmetu.

Cijeneći imovinu osuđenog u vezi sa prikupljenim podacima i podacima iz presude koja se opoziva, sud je nesporno utvrdio da je osuđeni u mogućnosti da izvrši plaćanje na ime oduzete protivpravno stečene imovinske koristi iznosa iz presude Općinskog suda u Gračanici 27 0 K 047890 21 K od 08.12.2021.godine.

Na osnovu izloženog odlučeno je kao u izreci.

POUKA: Protiv ove presude može se izjaviti žalba u roku od 15 dana od dana prijema prepisa presude Kantonalnom sudu Tuzla putem ovog suda.

Zapisničar  
Nadina Delić

Sudija  
Husejin Šerbečić